

ORD CUSCHINA FMR

Placats e mesiras

Dapi quest'emna preschentan nus en la rubrica sin la davosa pagina vegls placats turistic. Ils emprims placats che la redacziun ha chattà, ha dal rest mess a disposiziun la Biblioteca chantunala dal Grischun, la quala rimna e digitalisescha tals placats. Quels placats èn damai accessibels publicamain per in e mintgin. Tut tenor custi in pèr francs, sch'ins vules in exemplar en furma digitala.

En connex cun las votaziuns federalas dals 13 da favrer vegnin nus da la Fundaziun Medias Rumantschas dumanads qua u là, sche la decisiun en connex cun il pachet da medias avess era ina consequenza per nus? Atgnamain betg direct. La FMR è bain era finanziada cun raps publics, dentant sur l'Uffizi federal da cultura en il rom da la promoziun da la lingua rumantscha. Però indirectamain pertutga la votaziun sa chapescha era la FMR – u meglier ditg ses lecturs e sias lecturas. Perquai che las chasas edituras che publitgeschan las gasettas rumantschas (Pagina da Surmeir, Posta Ladina e La Quotidiana) survegnissan sustegn sur il pachet da mesiras e fissan perquai fitg cuntentas, sch'i dess in GEA als 13 da favrer (guarda la survista sin pagina 3).

Per la redacziun,
David Truttmann, schefredactor FMR

CORONA

Il chantun è optimistic

Il chantun Grischun è quietà e schizunt precautamain optimistic areguard il svilup da la pandemia. Quai ha ditg la media chantunala Marina Jamnicki questa gievgia avant las medias.

La situaziun actuala saja stabila. Ils cas sa reduceschian, restian dentant vinavant sin in aut nivel. Uschia han infurmà questa gievgia a Cuira las autoritads grischunas. La raschun per la reducziun dals cas possia dentant er esser il fatg ch'i vegn testà pli pauc. Per quest motiv saja al mument grev da far prognosas. Actualmain fa il Grischun anc tests regulars en 277 manaschis, cun var 9500 collavuraturas e collavuratur. Quai èn cunzunt manaschis en il sector da sanadad.

Levgià è il chantun era dal dumber da las ospitalisaziuns. La tema d'ina unda d'ospitalisaziuns n'è fin ussa betg sa cumprovada. Cuntrari – en las staziuns intensivass èn actualmain mo pazientas e pazients da l'unda da la varianta Delta, dentant nagins cas d'Omicron.

Il mument vegnan tgriradas 32 pazientas e pazients da corona en ospitals grischuns, set sin staziuns intensivass. Var 3400 persunas sa chattan en izolaziun. La quarantina vegn però de facto abolida. A partir dad immediat pon persunas che ston ir en quarantina sa laschar testar da persunas dal fatg. Vul dir: cun in test a partir da l'emprim ed in test l'ultim di da la «quarantina» po quella vegnir remplazzada. (rtr/fmr)

LA CIFRA DAL DI

21,89 miliardas

avevan custà dal 2014 ils Gieus olimpics d'enviern a Sotchi, tenor indicaziuns da datas da l'Universitad dad Oxford. Ils gieus da Sotchi èn damai stads ils pli chars gieus olimpics d'enviern en fin ussa. Quels a Pyeongchang da l'onn 2018 avevan lura custà «mo» 12,9 miliardas. Per cumparegliar: Ad Innsbruck/Puntina aveva tut l'istorgia custà dal 1976 anc 0,12 miliardas. Quintessenza: Il spiert olimpic ha ina brava chareschia. (fmr/dat)

La reclama per tubac ha uffants e giuvenils en mira

Gievgia ha il comité grischun che sustegna l'iniziativa per la protecziun dals uffants e giuvenils da la reclama da tubac preschentan ses arguments. Ils 13 da favrer votescha il pievel svizzer davart quella iniziativa.

MARTIN GABRIEL/FMR

Il comité grischun che fa reclama per in GEA a l'iniziativa Uffants senza tubac vegn sustegnì fermamain da la Lia grischuna cunter il cancer e da la Lia pulmonara grischuna. Las tschintg dunnas ed umens da la politica e da la medischna a la testa dal comité han preschentanà gievgia a Cuira lur puncts da vista e lur motivaziun da s'engaschar per l'iniziativa. Quella vegn refusada dal Cussegl federal e dal parlament cun ina cuntraproposta. Tenor ils iniziants duai la reclama per tubac, la promoziun da la vendita e tut il sponsoring d'interpresas da tubac che cuntanschan uffants vegnir scumandads. E quest scumond vegniss francà en la Constituziun federala. 9500 Svizras e Svizzers moran mintg'onn da malsognas en consequenza dal consum da tubac.

Ils blers cumenzan en la pubertad

En in votum fitg engaschà avant las medias ha la cussegliera naziunala Sandra Locher Benguerel ditg ch'ella saja dischillusa ch'il parlament federal haja approvà ina cuntraproposta che na saja nagut auter ch'in exercizi dad alibi: «Tenor la cuntraproposta èsi precis en ils lieux cun in grond public d'uffants e giuvenils lubì er vinavant da far reclama per tubac. Per exempel en gasettas gratuitas, en kioscs, en l'internet e sin areals da festivals.» 60 pertschient dals fimaders cumenzian a fimar durant la pubertad, damai cun var 13 onns. Uschia saja cler tge public che l'industria da tubac haja en mira.

«Jau stun uschè mal d'avair cumenzà»

«En ils onns 1970 vegniva fimà perfin sin las staziuns da tgrira dals ospitals», ha quinta l'anteriura tgrirunza e deputada Martha Widmer-Spreiter da Cuira che fa era part dal comité. Uschia haja era ella cumenzà a fimar durant l'empredissadi en il spital. Propi libra dal fimar na saja ella mai pli vegnida. «Jau stun oz uschè mal d'avair cumenzà cun quest vizi», ha la politicra ditg en in raschioni cun la FMR. «Jau hai chala varga 10 onns da fimar e lura puspè cumenzà. Jau hai anc chala bieras giadas e mintga giada cur che jau hai in pau squitsch, cumenz jau puspè.» En il comité s'engascha



Il comité grischun vul scumandar la reclama da tubac che cuntanscha il curn d'uffants e giuvenils. FOTO LIVIA MAUERHOFER

«Gea per uffants senza tubac»

Il comité grischun «Gea a la protecziun dals uffants e giuvenils cunter la reclama da tubac» s'engascha è per in scumond da la reclama per tubac. Tuttas activitads da promoziun e da sponsoradi che cuntanschan uffants e giuvenils duain vegnir scumandadas. Il comité grischun ha in patronadi che consista da las suandantas tschintg persunas:

Urs Hardegger, deputà l'Alleanza dal Center

Géraldine Danuser, presidenta da la Partida verd-liberala GR, Cuira
Sandra Locher Benguerel, cussegliera naziunala dal PS, Cuira
Martha Widmer-Spreiter, deputada da l'Alleanza dal Center, Cuira
Roger von Moos, schefmedi oncologia e hematologia al Ospital chantunala dal Grischun, Cuira

Martha Widmer-Spreiter era per dar vinavant ses messadi als giuvenils ed als uffants dad oz.

Mintg'onn 130 cas da cancer

En il chantun Grischun survegnan mintg'onn var 130 pazientas e pazients la diagnosa cancer dal lom. Dapli che la mesadad da quels cas sajan en in stadi avanzà e betg pli curabels. Il

schefmedi da la partiziun oncologia e hematologia da l'Ospital chantunala a Cuira, Roger von Moos, ha rapportà da destins fitg dolurus e tragics. «Jau hai vesi situaziuns che pazientas e pazients e confamigliars eran al cunfin da quai che l'uman po supportar.» Latiers vegnan ils custs: «Be ils medicaments per tractar il cancer dals pulmuns custan 100 000 francs per onn per pazient.»

Mediomatix – in «novum en l'istorgia»

Radund 260 carnets da lavur e commentaris èn vegnids sviluppads ils ultims sis onns. Els furman la basa per l'instrucziun da rumantsch en ils idioms puter, vallader, sutsilvan e sursilvan. En fin l'onn 2029 vegn la seria «Mediomatix» cumpletta cun adattar il med en l'idiom surmiran.

SANDRA BALZER/FMR

In mument decisiv per las scolas rumantschas e la Rumantschia: Ils davos meds d'instrucziun idiomatics per la 5. e 6. classa dal stgalim primar èn edids. Els cumpletteschan la seria «Mediomatix» ch'è concepida per l'instrucziun da rumantsch en la 2.-9. classa. Il resultat: betg main che 256 carnets da lavur e commentaris per scolastas e scolasts en ils idioms puter, vallader, sutsilvan e sursilvan. Ils meds èn orientads a cumpetenzas ed uschia cumpatibels cun il Plan d'instrucziun 21. Sper ils meds stampads èn disponibels varsquants cuntregns digitals per la magistraglia ed ils uffants. Era il cusseglier guvernativ Jon Domenic Parolini sa legra davart la finiziun gartegiada: «Igl è in novum en l'istorgia, che l'entira Rumantschia instruescha tenor principis eguals.»

Sis onns lavur

La Scola auta da pedagogia dal Grischun è vegnida incumbensada dal Departament d'educaziun dal Grischun d'elavurar tranter il onn 2016-2021 in nov med d'instrucziun da lingua en ils quatter idioms. Actualmain vegn cumpletta la collecziun dal med da lingua «Mediomatix» per l'instrucziun en surmiran. Quai è ina consequenza da la decisiun dal 2020 da las



Han plaschair davart il project gartegià: (da san.) Gian-Paolo Curcio (rectur Scola auta da pedagogia), Jon Domenic Parolini (cusseglier guvernativ), Josy Marie Künzler (manadra meds d'instrucziun Grischun), Rico Cathomas (manader dal project) e Sandro Tomaschett (magister Sedrun). FOTO SANDRA BALZER

vischnancas surmiranas da bandunar l'instrucziun en rumantsch grischun e turnar tar l'idi-

om. Il project da crear il med surmiran duai cuzzar fin l'onn 2029.